

**ՀՀ ֆինանսների նախարարություն**  
**Հարկային և մաքսային մարմինների գանգատարկման հանձնաժողով**

**Ո Ր Ո Շ ՈՒ Մ 5/8**

**24 հունիսի 2014 թ.**

Քննարկվեց «Բիո-Քիմ» ՍՊԸ 02.06.2014 թ-ի դիմում-գանգատը 2012 թ-ին ավելացված արժեքի հարկ վճարող համարելու վերաբերյալ:

**«Բիո-Քիմ» ՍՊԸ գանգատում բերված փաստարկները.**

«Բիո-Քիմ» ՍՊԸ-ն գործում է 1991 թ-ից և միշտ հանդիսացել է ԱԱՀ վճարող:

09.01.2012 թ-ին «Բիո-Քիմ» ՍՊԸ-ն (այսուհետ նաև ընկերություն) ԱԱՀ վճարող հաշվառվելու հայտարարությամբ (էլեկտրոնային հաշվետվությունների ցանկից ձև թիվ 71) դիմել է Շենգավիթի հարկային տեսչությանը և 28.02.2012 թ-ին ստացել է թիվ 22 հավաստագիրն առ այն, որ «Բիո-Քիմ» ՍՊԸ-ն հարկային տեսչությունում հաշվառված է որպես ԱԱՀ վճարող:

Քանի որ վերոհիշյալ 71 ձևը նոր էր, ընկերությունը կարծել է, որ հենց դրանով էլ կհամարվի ԱԱՀ վճարող: Սակայն տեղի է ունեցել երկկողմանի թյուրիմացություն՝ ընկերությունն իրեն համարել է ԱԱՀ վճարող և հարկային տեսչության կողմից որևէ առարկություն չի ստացել:

Առաջնորդվելով վերը նշված հավաստագրով «Բիո-Քիմ» ՍՊԸ-ն 2012 թ-ի բոլոր 4 եռամսյակների համար հարկային տեսչություն է ներկայացրել ԱԱՀ-ի հաշվարկներ և 2012 թ. համար շահութահարկի հաշվարկ:

Նշված բոլոր հաշվետվությունները հարկային տեսչության կողմից ընդունվել են առանց որևէ առարկության: Որևէ առարկություն կամ վերանայման պահանջ չի ստացվել նաև ողջ 2013 թ-ի ընթացքում:

«Բիո-Քիմ» ՍՊԸ-ն չի ստացել որևէ գրություն կամ պահանջ այլ հարկատեսակի հաշվետվություն չներկայացնելու վերաբերյալ:

«Բիո-Քիմ» ՍՊԸ-ն միշտ եղել է կանոնավոր հարկատու և որևէ հարկատեսակի գծով պարտավորություն չի ունեցել:

Ելնելով վերոգրյալից՝ «Բիո-Քիմ» ՍՊԸ-ն խնդրում է 2012 թ-ին ընկերությանը համարել ԱԱՀ վճարող:

**ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.**

ՀՀ ֆինանսների նախարարության հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ խնդրո առարկա հարցի վերաբերյալ Հանձնաժողովը բազմիցս արտահայտել է իր դիրքորոշումը, որը կայանում է հետևյալում:

«Ավելացված արժեքի հարկի մասին» ՀՀ օրենքի (այսուհետ նաև օրենք) 3-րդ հոդվածի համաձայն՝ ԱԱՀ վճարող է համարվում, մասնավորապես, որպես ձեռնարկատիրական գործունեություն իրականացնող գրանցված իրավաբանական անձը՝ ԱԱՀ վճարող համարվելու վերաբերյալ հայտարարությունում նշված օրվանից մինչև հայտարարությունում նշած տարվա ավարտը, բայց ոչ շուտ, քան հայտարարությունը ներկայացնելու հաշվետու ժամանակաշրջանի առաջին օրացուցային օրվանից, եթե անձը կարող է համարվել շրջանառության հարկ վճարող, սակայն իր հաշվառման վայրի հարկային մարմին վերադաս հարկային մարմնի սահմանած ձևով գրավոր հայտարարություն է ներկայացրել ԱԱՀ վճարող համարվելու վերաբերյալ:

